



高年之人心力倦怠精神耗短百事懶於施爲全藉
子孫孝養持護行住坐臥皆須巧立制度以助娛
樂房室必常潔雅夏則虛敞冬則溫密牀榻不須
高廣比常制三分減一低則易於升降狹則不至
漫風衲褥務在軟平三面設屏以防風冷枕宜用
夾熟色帛制要低長低則寢無罅風長則轉不落
枕坐椅宜作矮禪牀樣坐可履地易於興居左右
置欄面前設几老人多困坐則成眠有欄圍免致
閃側衣服制度不須寬長長則易蹴絆寬則不着

身老人骨肉踈冷風寒易中若穿衣貼身暖氣着
體自然血氣流利四肢和暢雖盛夏亦不可令袒
露身體秋冬頸後連背常用軟帛自巾垂入衣領
以護腠理尊年人肢肉癭怯腠理開踈若風傷腠
理便成六患最宜謹慎若遇水火兵寇非橫驚怖
之事必先扶持老人杌安穩處避之不可喧忙驚
動尊年之人一遭大驚屈便致冒昧因生餘疾凡喪
塋凶禍不可令知敝漏_田平濕不可令居穢惡臭敗
粘硬生冷不可令食卒_二風暴寒煩暑燠熱不可令

宜溫熱熟軟忌粘硬生冷每日晨朝宜以醇酒先
進平補下元藥一服女人則平補血海藥一服無
躁熱者良尋以豬手腎粟米粥一盂壓之五味葱
薤鶉腎等粥皆可至辰時服人參平胃散一服然
後次第以順四時軟熟飲食進之食後行一二百
步令運動消散臨臥進化爽利膈人參半夏丸一
服高年之人不可頓飽但頻頻食使脾胃易化穀
氣長存若頓飽則多滿悶老人脾胃虛薄不能消
納故成疾患此養老人之大要也

右飲食

常見世人治高年疾患視同少年亂投湯藥妄行針灸不知老人血氣已衰百疾易攻至於視聽不聰明舉動不輕便身體勞倦頭目昏眩宿疾時發此老人常態若攻治太緊恐別致危殆汗之則陽氣泄吐之則胃氣逆瀉之則元氣脫此養老之大忌也太抵藥餌止是扶持之法只可用順氣進食補虛和中之劑不可妄用狼虎之藥若身有宿疾或時發動只隨其疾狀用中和之藥調順三五日自然無事然後隨食性變饌治之此良法也

右治疾

涉世善術

世人多言處世難非世果難處無所以處之之方耳
如我好勝誰非處其敗我好出誰非處其貧我好
自是誰非處其非我好安逸誰非處其勞碌推之
一切莫不皆然常將自己心向別人一忖量則損
人利己之事必不敢做閑閱四載籍見昔賢言語有
禪酬應者問命管城用書百紳雖不欲無加未易
幾及而取譬強恕其則不遠孰謂世果難處也

王主
蓋

臣

問祖宗之德澤吾身之所享者。是須念其積累之難。
問子孫之福祉吾身所貽者。是要思其傾覆之易。
孝於親則子孫孝。欽於人則衆人欽。爲子孫
作富貴計者。十敗其九。爲衆人作善方便者。其後
受惠。廣積不如教子。避禍不如省非。內睦者

家道昌。外睦者人事濟。治家最忌者奢。人皆知
之最忌者鄙。嗇而借名爲儉。人多不知也。鄙嗇之
極。必生奢男。東坡一帖云。僕行年五十始知作
活。大要。是怪耳。而文以美名。謂之儉。素然。吾儕爲

之則不類俗人真可謂淡而有味者詩云不戢不
難受福不那口體之欲何窮之有每加節儉亦是
惜福延壽之道住京師宜用此策 東坡與蒲傳

正書云千乘姪屢言大舅全不作活計多買書畫
奇物常典錢今退居之後決不能食淡味麤杜門
絕客貧親知相干決不能不應副此數事豈可無
備不可但言我有好兒子不消與營產業也書畫
奇物老坡近年視之不啻如糞土書而榜之壁間

爲山居第一戒

右治家

小兒輩不當以世事分讀書當令以讀書通世事

陳眉

公東坡與王郎書云少年爲學者每一書皆作數次讀當如入海百貨皆有人之精力不能兼收盡取但得其所欲求者爾故願學者每次作一意求之如欲求古今興亡治亂聖賢作用且只作此意求之勿生餘念求事迹文物之類亦如之若學成八面受敵與涉獵者不可同日而語

倪文節公

云松聲澗聲山禽聲夜蟲聲鶴聲琴聲棋子落聲雨滴階聲雪洒窓聲煎茶聲皆聲之至清者也而

讀書聲爲最聞他人讀書已極喜更聞子弟讀書
聲則喜不可勝言又云天下之事利害常相半有
全利而無少害者惟書不問貴賤貧富老少觀書
一卷則有一卷之益觀書一日則有一日之益右訓
後

程伯子曰立朝大槩前面踞放寬些若窄時異時合
自家無轉側處士大夫當寔有憂國之心莫徒
有憂國之語當爲天下必不可少之人莫作天下
必不可常之事以愛妻子之心事親則無往不

孝以保富貴之心事君則無往不忠 忠孝不修

雖有他善猶玉屑盈匣不可琢為珪璋剉絲滿筐

不可織為文綺

右立朝

蒞官之法事來莫放事去莫追。事多莫怕。為政之

要曰公與清成家之道曰儉與勤事上之道與其

徇之以法不若奉之以體臨下之法與其徇人之

情不若平我之情 救荒不患無奇策患無真心

真心即奇策也 七十而致仕禮法有明文何乃

貪榮者斯言如不聞可憐八九十齒墮雙眸昏朝

防口右處人

嚴於公門寬於百姓嚴於奸惡寬於良善政之體也
然公門防閑又當詳於大而畧於細若事事苛求
恐人不樂爲用奸惡懲治又當去其甚而警其餘
若人人計較或生他變是以持法者切忌任意而

過右臨下

六字經 曰忍曰方便曰依本分

九字經 勿欺心勿妄想守廉耻

長生飲 靜坐一味或止觀或納息隨便行之東坡

云無事此靜坐一日似兩日若過七十年便是百

四十人世何物能有此効此方人人收得苦無好

湯使多嚥不下

詩林廣記

富貴湯 無事以當貴 早寢以當富 安步以當

車 晚食以當肉 和勻隨意飲啖暢快無比

鶴林

玉露

快活散 除煩惱 斷妄想

洒掃靜室窓楞虛 朗前列小檻栽花種竹貯水養

魚室中設几榻蒲團跏趺調息將前藥用清靜湯

熟思

審處

守口

防意

凡遇難事大事將

四味用不語津細細咀嚼徐徐嚥下至胸膈中又要溫養多時方可出而應事久行不已自然事事妥帖時時安穩語云思之思之思之不通鬼神將通之又曰不曰如之何吾末如之何也已矣又曰防意如城守口如瓶從古聖賢都用這箇方得效妙難盡述

右數方無勞遠索不費錢買日用尋常最簡最易苟能常服不息豈惟免一朝之患兼可無終身之虞

明哲君子宜深味之

書室清供

書室宜清幽不用太高峻宜明淨不可太宏敞清幽
明淨可爽心神高峻宏敞易傷目力左右植青松
數株副以奇石四壁藤蘿滿牆下植吉祥菖蒲鹿
葱翠芸等草更置建蘭一二盆有隙地種竹數竿
梅數株以助清芬高濂以著述爲文繡以誦讀爲
菑畬以記問爲居積以前言往行爲師友以忠信
篤敬爲修持以作善降祥爲因果以樂天知命爲

西方

陸平泉
日課

讀義理書學法帖字澄心靜坐益

友清談小酌半醺澆花種竹聽琴玩鶴焚香煎茶
登城觀山寓意棋奕十者之外雖有他樂吾不易
矣齊齋
十供心閑手懶則觀法帖以其可逐字放置

也手閑心懶則治迂事以其可作可止也心手俱
閑則寫字作詩文以其可兼濟也心手俱懶則坐
睡以其不強役于神也心不定宜看詩及雜短故
事以其易于見意不滯于久也心閑無事宜看長
篇文字或經註或史傳或古人文集此又甚宜于
風雨之際及寒夜也又曰手冗心閑則思心冗手

閑則臥心手俱閑則著書作字心手俱完則思早

畢其事以寧吾神

吳子彥書室中修行法

道服

製如中衣以白布爲之四邊緣以緇布或用

茶褐爲袍緣以皂布以呂公黃絲絛副之用以坐

禪策蹇衝雪禦寒堪稱雅製

書

余每欲藏萬卷異書襲以異錦薰以異香茅屋

蘆簾紙窓土壁終身嘯咏其中

陳眉公

硯

滌硯不宜用湯損石硯宜頻易新水去塵

陳眉公

雌黃銀硃皆能剝硯雌黃尤甚

墨

墨之妙用質取其輕烟取其清嗅之無香磨之

無聲新硯新水磨若不勝忌急則熱熱則沫生用

則旋研研無久停塵埃汚墨膠力泥凝用過則濯

墨積勿盈藏久膠宿墨用乃精

高深甫

養新墨納

輕器中懸風處每丸封以紙防濕氣相搏勿臥放

恐致曲蓄故墨亦利風日時頻以手潤澤之常置

衣袖中彌善

屠緯真

墨宜頻易故囊去濕

山谷

誠子弟云吉蠲筆墨如澡身浴德揩拭几硯如攻

過遷善敗筆浣墨曠子弟職書几書研自黔其面

惟弟惟子臨深戰戰

琴

草堂中蓄古琴一僻處製琴室一地下埋大缸

一缸中懸銅鐘一以薄石板或木板鋪之上置琴

執或木几彈琴其間聲韻清亮自有物外氣度

神隱

香

爐焚香霧隱隱遠簾可祛除穢惡最優者惟伽

南弟購之甚艱非山家所能卒辦其次莫若沉香

沉有三等上者氣太厚又嫌于辣下者質太枯又

涉于烟惟中者最滋潤而幽甜可稱妙品煮茗之

餘乘茶爐火取入香鼎徐而焚之甚便 伽南有

糖結伽南鋸開上有油如飴糖黑白相間黑如墨
白如糙米焚之初有羊羶微氣有金絲伽南色黃
有綵若金絲 角沉質重劈開如墨色者佳不在
沉水好速亦沉水當細辨之 片速俗名鯽魚片

雉鷄斑者佳有僞爲者亦以重實爲美 噉叭一
名黑香軟淨色明者佳手指可撚爲丸者妙甚

香角俗名牙香面有黑爛色者爲鐵面純白不烘
焙者爲生香生香之味妙甚在廣中價亦不輕

黃檀黃實者佳茶浸炒黃去腥 蒼朮句容茅山

產細梗如猫糞者佳

俱屑
綿真

深山幽棲爐香不可

缺退休久佳品乏絕野人爲取老松栢之根枝葉
實共擣治研楓肪羣和之時焚一丸亦足助清苦

即安

香奩

嗜香者不可一日去香書室中宜製提匣作

三撞式用鎖鑰啓閉內設磁盒磁確漆匣木匣隨

宜置香以便取用須子口緊密勿令香泄爲佳

掩戶焚香清福已具如無福者定生他想更有福

者輔以讀書

隔火 銀錢雲母片玉片砂片俱可火浣布如錢大者銀鏤周圍作隔火尤妙凡蓋隔火則炭易滅須于爐四圍用筋直棚數十眼以通火氣爐中不可斷火卽不焚香使其長蘊亦可且灰燥易燃謂之靈灰燒燼餘塊收起投入火盆可薰衣被

爐灰 紙錢灰一斗石灰二升和成團燒紅研細入爐則火不滅忌雜火惡炭入灰炭雜則灰死不靈入火一蓋卽滅茄蒂燒灰亦可

炭墜 鷄骨炭碾爲末入葵葉或葵花少加糯米湯

和成餅或爛棗入石灰和炭造亦妙

宿火

胡桃燒半紅埋熟灰中可三五日

屠緯
真

榻

草堂竹窓下宜置一榻倦時偃仰可爽心神榻

高一尺二寸長七尺橫如長之半周設木格便午

睡傍立四柱掛壁瓶便挿花後設漆板約寬二尺

自地及頂可靠以清座左右設橫木可掛衣左安

書厨一便受冊籍前安綠漆小荷葉一寘香爐牀

用木頂前安小踏牀布衾蒲褥菊花枕梅花紙帳

北窓一覺恍遊羲皇矣

短榻高九寸方圓四尺

六寸三面靠背後背少高用以坐禪習靜甚便斜倚

禪椅 嘗見吳破瓢所製祿天台藤爲之靠背用大理石坐身則百衲者古秀瑩滑精巧無比

隱几 以怪樹天生屈曲若環帶之半者爲之橫生三丫作足出自天然摩弄瑩滑置蒲團或榻上倚手頓頤可憑以臥

蒲墩 冬月用蒲草爲之高一尺二寸四面編束細密堅實內用木車坐板以柱托頂久坐不壞暑月

可置藤墩

蒲團 有徑三尺者席地快甚吳中製者精棕團亦佳或以青氈爲團中印白梅一枝甚雅以雄黃熬蠟作布團可遠濕辟虫蟻

滾凳 以木爲之長二尺濶六寸高如常四程鑲成中分一鎗圓木二根兩頭留軸轉動凳中鑿兩竅活裝以脚踰軸滾動往來蓋湧泉穴精氣所生故以運動爲妙

暑綿真

林泉樂事

人生太閑則別念竊生太忙則真性不現故士君子不可不抱虛生之憂亦不可不知有生之樂舒
休常少憂戚常多自古而然以道眼破之則無不
自得當樂境而不能享畢竟薄福之人當苦境
而反覺其方是真修之士人若知道則隨境皆
安人不知道則觸塗成滯人不知道則居鬧市生
囂雜之心將蕩無定止居深山起岑寂之想或轉
憶炎囂人若知道則履喧而靈臺寂若何有遷流

境寂而真性冲融不生枯稿

暑緯真

陳眉公有言

退之詩云居閑食不足從官力難任兩事皆害性

一生常苦辛子瞻詩云家居妻兒號出仕猿鶴怨

未能逐什一安敢搏九萬二公猶不免徘徊于進

退之間其後退之迷雪于衡山子瞻望日于儋海

回視闔戶擁衾簟瓢藜藿不在天上乎故考槃詩

云獨寐寤言永矢弗諼

右抽身宜蚤

居閑勝于居官其事不一其最便者尤于暑月見之

自早燒香食罷便搔首杖屨從事簾牀竹几

高枕北窓清風時來反患太涼挾策就枕困來熟
睡晚涼浴罷杖履逍遙臨池觀月乘高取風採蓮
剝芡剖瓜雪藕白醪三杯取醉而適其爲樂殆未
可以一二數也

沈仕

山居勝于城市蓋有八德不

責苛禮不見生客不混酒肉不競田宅不問炎涼
不鬧曲直不徵文逋不談仕籍 林洪云山林交

與市朝異禮貴簡言貴直所尚貴清善必相薦過
必相規疾病必相救藥書尺必直言事初見用刺
不拘服色肅入叙坐稱呼以號及表字不以官講

問必實言所知所聞事有父母者必備刺拜報謁
同自後傳入一揖坐詩文隨所言勿及外事時政
異端飲食隨所具坐次序齒不以貴賤僧道易飲
隨量詩隨意坐起自如不許逃席乏使令則供執
役請必如期勿違客例有幹實告及歸不必謝凡
涉忠孝友愛事當盡心無慢嫉前輩須接誘後學
共追古風貴介公子有志于古者必不驕人苟非
其人不在茲約凡我同盟願如金石

右禮節
宜簡

歲月本長而忙者自促天地本寬而忙者自隘風花

雪月本閒而忙者自勞 條風旣鬯細草茸生嫩

柳韶姿紅藥齊含蘂藿春景大殢人情清露晨流

碧梧初放新篁爽氣綠陰映入簾幃夏時尤堪清

賞 風晨月夕客去後蒲團可以雙趺烟島雲林

興來時竹杖何妨獨往 三徑竹間日華澹澹固

野客之良辰一編窓下風雨瀟瀟亦幽人之好景

道上紅塵江中白浪任他南面百城花間明月

松下涼風輸我北窓一枕

俱屠絳真右
隨時取適

口中不設雌黃眉端不掛煩惱可稱烟火神仙隨宜

而栽花竹適性以養禽魚此是山林經濟道人
好看花竹寄託聊以適情居士偶聽絃歌不染何
妨入道 草色花香游八賞其有趣桃開梅謝達
士悟其無常 淨几明窓好香茗有時與高衲

談禪萱棚菜圃暖日和風無事聽閑人說鬼 茶

熟香清有客到門可喜鳥啼花落無人亦自悠然

俱暑
緯真

陳眉公云遇佳山水處或高僧野人之廬

竹樹蒙茸草花映帶幅巾杖履相對夷然至於風
光淡爽水月空清鐵笛一聲素鷗欲舞斯亦避喧

謝客之一策也邵堯夫云但看花開落不言人是
非。古云鶴笠鷺蓑鹿裘鵲冠魚枕杯猿臂笛與
夫畫圖之屋廬詩意之山水皆可遇而不可求可
求而不可常余惟紙窓竹屋夏葛冬裘飯後黑甜

日中白墮

古遇物
陶情

陳眉公云不能卜居名山卽于崗阜迴複及林水幽
翳處闢地數畝築室數楹插槿作籬編茆爲亭以
一畝蔭竹樹一畝栽花果二畝種瓜菜四壁清曠
空諸所有畜山童灌園薙草置二三胡牀著亭下

挾書研以伴孤寂
攜琴奕以遲良友
凌晨杖策抵
暮言旋此亦可以娛老矣
孫真人云凡遇山水

塢中出泉者不可久居
常食作癭病
凡陰地冷水

不可飲之必作疾瘡

右擇
幽棲

陳眉公曰凡山具設經籍
機杼以善族訓
家備藥餌

方書以辟邪衛疾
儲佳筆名繭以點繪
賦詩留清

醪雜蔬以供賓
獨酌補破衲舊笠
以犯雪當風畜

綺石奇墨古玉異書
以排閒永日製柳絮枕
蘆花

被以連牀夜話
狎黃面老僧白頭漁父
以遣老忘

機右儲
隱料

陳眉公曰凡住山須二小舟朱欄碧幄明櫺短帆舟
中雜置圖史鼎彝酒漿薜脯近則峯泖遠則北至
京口南至錢塘風利道便移訪故人有見留者不
妨一夜話十日飲右具
遊艇

乙丑四月廿三日





